

DOCTRINA PILA

1987

Iglesia Jesús Miya

junsi

Iglesia Luz del Mundobe

in doctrina pilaca quicala joe.

DOCTRINA

I. ¿DIOSICHI COSACA (DOCTRINACA) NIYAQUE MIINTSAN JUN?

- A. Doctrinaca seque miichun, Diosichi Pilaca fécari tennantsan joe.

Salmo 119 --Case versículo cura Diosichi Pilaca, yachi mantaca, yachi fiqica, ya mantacaca, panun joe.
Junnan tenhinsan joe Diosichi Pila duque importante joeque.

Salmo 19:7-8 --Diosichi mantá sensiri joe.

2 Timotéochi 3:14-15 --Diosichi Pila quirato, miintsan joe Jesucristobe cayaito se lono joeque.

2 Timotéochi 3:16-17 --Diosichi Pila Diosi chutesa carica jun pila joe. Micarino, payino, mantucarino sen joe.

Marcos 12:10 --Yachi Pilabi pacaca mirantsan joe.

Mantá Tanla 8:35 --Felipe micarinato, Diosichi Pilabi chutecaca micarinaminue.

Mateo 4:4 --Jesucristo patsa Diosichi Pilabi chutecaca manpanue yucanbe cuenta quinato.

Junni sen doctrinaca miichun, palaque seiton micariminlabe encañaituchun, Diosichi Pilaca fécari tennantsan joe.

- B. Junte nechi Diosichi Tencacanan tennantsan joe yari chiquilaca tuca micarichunaeque.

Juan 16:13 --Diosichi Tenca tsarasica micarichunae.

1 Coríntolachi 2:10-16 --Diosichi cosaca Diosichi Tencaberi miintsan joe.

Efésolachi 1:17 --Diosibe rocaínola joyoe chiquilachi tencabi miisa carisa.

Juanchi Caque 2:27 --Diosichi Tenca chiquilaca fe seque micarimin jochunae.

- C. Jun cotole uyan Jesucristobe penenaminla micarica fiqicanan tennantsan joe (yalanan tuca quereiminla jonari, junsi Diosica laquirato seque nenalaranari).

Juntonan uyan micarinaminlaca meránato, tencabe meránola joyoe. Yala man quiraque pánari, Diosichi Pila uyan quiraque pánari, yalaca natiya merátuntsan joe.

2 Timotéochi 3:6-10 --Pablo seque nenamin jonun tenchi yaca meránola joe tinue.

Israelítalachi 13:7 --Micariminlaca quirantsan joe. Seque nenalaranari, yalaca fécarí merántsan jochunae.

Mantá Tanla 24:14 --Pablo micarica fiqui Diosichi Pilabi chuteca fiqinán joe.

Mantá Tanla 17:11 --Beréabi chuminlari Diosichi Pilabi ma cura quiramin jominlanue Pablo micarica fiqui tsarasi fiqui jonunca miichun.

Mateo 23:2-3 --Tsan josanan, in versiculobi Jesucristo uyan quiraque paca joe. Fariséolari seitonla jotonan, israelítala tala Diosichi mantate micarimin jominlanue; junnan fariséola cuuenta nenatuntsan jotonan, yala micarica fiquica merántsan jominue.

II. TSAN JONARI, ¿TI QUINTSAN JUN?

A. Diosichi Pilaca quiran, estudiain, intsán joe.

2 Timotéochi 2:15 --Diosichi fiquica seque micarintsan joe.

Pédrochi Benete 1:19-21 --Diosichi Pilari man quiraque pánari, tsachilari "Te, tsantitue; uyan quiraque pánae" tituntsan joe.

B. Diosichi Pilaca estudiainato, yabe rocaintsan joe yape chiquilaca ayudaisa.

C. Palaque micariminla Diosichi Pilaca miiototo (o tennatuto) palaicala joe. Junni palaituchun, Diosichi Pilaca seque estudiaito miintsan joe.

1. Weyanlari micarinato, "Weyan tsachicaca fituntsan joe" timinla joe. Tsan josanan, Diosichi Pilabi itsanque chuteca joe:

Lucas 11:41 --Cristo patsa paca joe ticatiya fino se joeque.

Marcos 7:19 --Cristo jera anoca fintsan joe tinue.

1 Timotéochi 4:3-5 --Seitonque micariminlari weyan anoca fituntsan joeque mantalaquichunae.

2. Weyanlari micarinato, "Jerale Jesucristochi tsachila merátunun fiquichi panola joe" timinla joe. Tsan josanan Diosichi Pilabi itsanque chuteca joe:

1 Coríntolachi 12:10, 29-30 --Weyanlasiri merátunun fiquichi panola jochunae; jeralela panola itochunae.

3. Weyanlari micarinato, "Jesuchi ayanca adoraintsan joe" timinla joe. "Ya natiya jutsa quituto, yanan se larimin joe" timinla joe. Tsan josanan, Diosichi Pilabi itsanque chuteca joe:

Lucas 1:47 --Maríanan se lariminca munaraminue.

Lucas 8:19-21 --Jesús jerale Diosichi fiquica meráto mantaiminlacanan "Ayan, Aco" timin joe.

Lucas 11:27-28 --Jesuchi ayanca "pansi jochunae" tintsan jotonan, Diosichi mantaca meráminlacari fécarí tsantintsan jochunae tinue.

4. Weyanlari micarinato, "Trinidad" tinun fiquica "una doctrina del diablo" timinla joe. "Jesuchi mumunbesiri mumunquintsan joe" timinla joe. "Apachi mumunbe, Naochi mumunbe, Diosichi Tencachi mumunbe mumunhitori, se loca itochunae" timinla joe. Tsan josanan, Diosichi Pilabi itsanque chuteca joe:

Mateo 28:19 --Jesucristo patsa mantanue Apa Diosichi, Naochi, Diosichi Tencachi mumunbe mumunsa.

Marcos 1:9-11 --Diosichi Nao pibi wirurasanan Apa Diosi jamochi nechi pánae. Junnasanan Diosichi Tenca patanae.

Génesis 1:26 --Tsachilaca quechinatc, Diosi "Quisa!" o "Quechinayoe" titunue; "Quilaquisa!" tinue.

2 Coríntolachi 13:14 --Pablo coríntolachi tenchi bendición farinato, Apaca, Naoca, Tencaca bendeciquisa rocaíne.

III. ¿FECARI TENNANTSAN JUN DOCTRINA, TI JUN?

A. Diosica.

1. "Trinidad." Diosi mancari jotonan, pemañca "persona" joe. Yalaca Apa, Nao, Diosichi Tenca tinunla joe.

Génesis 1:26

Mateo 28:19

Marcos 1:9-11

2 Coríntolachi 13:14

2. Apa Diosi. Diosichi Pilabi "Diosi" tinari, Apa Diosica tsantinae. Antiguo Testamentobi duque ne Apa Diosica pánao, castila fiqichichi "el Señor" timin joe. Tsafiqichichi Antiguo Testamentobi "Miya Diosi" tinun joe.

Israelítalachi 11:6 --Diosi joe.

Santiago 1:13 --Jutsa quitumin joe.

Juanchi Caque 4:7-10 --Laquiramin joe.

Israelítalachi 10:31 --Casticaquimin joe.

Ezequiel 18:31-32 --Casticaquino munaratue.

Salmo 139:2,7 --Jera miramin joe.

Jeremías 32:17,27 --Jera quica joe; jera poden joe.

Quirajanunca 1:8 --Jera poden joe.
Daniel 4:25 --Miyalaca mantá tan suwamin joe.
Románolachi 13:1 --Miyalaca miya suwamin joe.
Mateo 10:29 --Na cosalacanan jera mantamin joe.

3. Diosichi Nao, Jesucrísto.

Mateo 1:18, 21 --Unila iton sona yaca na quinue; junni
yari se larimin joe.
Marcos 1:1 --Diosichi Nao joe.
Juan 4:42 --Se larimin joe.
Mantá Tanla 4:12 --Yasiri se larimin joe.
Isaías 9:6-7 --Duque sen joe.
Juan 5:23 --Yaca respetaintsan joe.
Juan 5:27 --Mo jutsa quica jonunca miimin jochunae.
Efésolachi 1:20-23 --Jera ticatiya fe joe.
Colósalachi 1:15-20 --Yari jera to, titiya jera quica
joe; duque mantá tan joe.
Filípolachi 2:6-11 --Jerale uyanlaca fécarí mantá
tan joe.

4. Diosichi Tenca.

a. Antiguo Testamentobinan Diosichi Tencari duque
quinaminue.

Génesis 1:2 --Diosi ticatiya jera quinasa,
Diosichi Tencanan pequinaminue.
Génesis 41:38 --Matu matenan tsachilachibi
Diosichi Tenca jamin jominue.
Salmo 51:11 --David Diosichi Tenca tan jominue.

1 Samuel 16:14 --Diosichi Tenca Saúlchibi
jominnan manlonue.

b. Diosichi Tenca Jesucristochibi jera winue.

Mateo 3:16

Juan 3:34

c. Nuevo Testamento tiempote nechi, jeralé Diosichi
tsachilari Diosichi Tencaca talarayoe.

Juan 3:5-8 --Diosichi Tencari tsachilaca Diosichi
nalala suwamin joe.

Mantá Tanla 2:17-18 --Diosi numarinan paca
jominue yachi Tencaca ereyanaeque.

Románolachi 8:9 --Diosichi Tencaca itominlari,
Diosichi tsachila itolajoe.

Románolachi 8:16 --Diosichi Tencari chiquilaca
Diosichi nalala jolajoyoeque tenthisa
carimin joe.

Efésolachi 2:22 --Diosichi Tenca chiquilachibi
chunan, Apa Diosi chiquilachibi chue.

d. Diosichi Tenca yachi tsachilachi tenchi duque
quimin joe.

Mantá Tanla 8:29 --Felípeca erenué.

Mantá Tanla 16:7 --Diosichi tsachilaca mantanue
ti quinola jonunca.

Románolachi 8:26 --Chiquilachi tenchi Apa Diosibe
rocaimin joe.

1 Coríntolachi 12:3-11 --Diosica se timiyamin
joe; yachi tsachilaca titiya quino poden
suwamin joe.

e. Jeralé Jesucristochi tsachila Diosichi Tencaca
tanla josanan, jeraléla Diosichi Tencabe jera
mantaituminla joe. (Castila fiqichi pato,
jeraléla "llenos del Espíritu" itolajoe.)

Galásialachi 5:16-18, 22-25 --Tsachila Diosichi
Tencabe jera seque mantaitori, tsanque seque
nenalarachunae.

Mantá Tanla 2:4 --Pentecostés mate Diosichi
Tenca yalaca jera "llenáquinue."
Efésolachi 5:18 --Diosichi Tencabe "llenaica"
josa mantanue.

B. Tsachila.

1. Diosi tsachilaca quinue.

Génesis 1:26-28 --Diosi tsachilaca quinato, yalaca
Diosi cuwenta quinue.

Génesis 1:31 --Diosi yalaca quinato, yalaca sen
quinue.

Génesis 2:15-17; 3:6-7, 16-19 --Tsachila yucanca
meráto, jutsa pun ilainue.

Románloachi 5:18-19 --Matu to tatala jutsa quiminla
jonan, chiquilanan jutsa quimin jolajoyoe.

2. Tsachila jutsa quiminla joto, niyan inola jonunca.

Juan 3:18 --Quereituchi tinun tenchi
casticailaichunae.

Efésolachi 5:3-6 --Jutsa quinun tenchinan
casticailaichunae.

Mateo 25:41 --Yalanan yucan padeseino jun ninbi
pecasticailaichunae.

Marcos 9:43-47 --Ya nin numanan jeraituchunae.

Quirajanunca 21:8 --Jutsa quiminlaca wa pipilunan
quiran ninbi quepochunae.

3. Tsachila niyaito se lono jonunca.

Juan 1:12 --Jesucristobe cayaito, Diosichi nalala ino
poden jolajoyoe.

Juan 3:16 --Jesucristobe cayaica junlaca se larimin
joe.

- 1 Timoteóchi 1:15 --Jesucristo jutsa quiminlaca se laribi jaca jominue.
1 Coríntolachi 1:21 --Diosichi fiqui micaricaca meráto quereintsan joe se lochun.
Efésolachi 2:8-9 --Tsachila tenfeto se lono podeitulajoe; Diosi chiquilaca laquiratosiri chiquilaca se larimin joe.

C. Angelila.

- Génesis 19:1, 12-13 --Angelila Diosi ereca jun nenaminla joe.
Mateo 4:6,11 --Angelila isaimin, junsí cuidaimin jolajoe.
Mateo 13:37-41 --To yucapiyarino mate ángelila tsachilaca layalaquichunae.
Mateo 22:30 --Angelila tsachila cuwenta itolajoe; casalaituminla joe.
Colósalachi 2:18 --Angelilaca adoraituntsan joe.
Israelítalachi 1:4-7 --Diosichi tsachilachi tenchi titiya quiminla joe.
Israelítalachi 13:2 --Weyante ángelila tsachilanan quiran ito tsachilachite nenaminla joe tsachilari mitolajosanan.
Quirajanunca 12:7 --Angelilari yucanchi ocolabe quicaaminla joe.
(Weyanla pato, "Puyaca jun tsotsoca nalalari ángelila iminla joe" timinla joe. Diosichi Pila mantimini natiya tsantitue. Yari epe fiqui joe.)

D. Yucan.

- Quirajanunca 20:2 --Satanás, yucan, Edenbi pini jomin, yanan joe.
Génesis 3:1-5 --Tsachilaca jutsa quisa carinue.
Génesis 3:13-15 --Yucan Jesucristoca duque fuda suwachunae tinue; tsannan Jesucristo yucanca tsanle yucapiyarichunae tinue.
Lucas 10:18 --Jesús yucanca jamochi nechi darapatinaminca quiranue.

- Mateo 4:3,10 --Yucan Jesucanan jutsa quisa carichique tenfenué.
- Marcos 4:15 --Diosichi fiquica meráminlaca manpansisa carimin joe.
- 2 Coríntolachi 2:11 --Duque tenca oco joe.
- 2 Coríntolachi 11:14 --Duque sennan quiran imin joe.
Junnan yucan quisa carichi tinun cosala seitonnan quiran itochunae. Duque seiton jotonan, duque sennan quiran jochunae. Mantenhíde! ¿Huerto de Edenbi yucan Evachi puca cuwanuco? Junni ya pucari uta tintsan quiran itominue; duque moso jominue.
- Israelítalachi 2:14 --Puyasa carimin joe.
- Pédrochi Caque 5:8 --Papun luquela cuwenta yucapiyarichi timin joe.
- Juanchi Caque 3:8 --Yucan numari mánta jutsa quin, nene pan, quimin joe; juntonan Jesucristori yucan titiya quicaca yucapiyaribi jaca jominue.
- Quirajanunca 12:10 --Diosichi cale Jesucristochi tsachilaca culpa quimin joe.
- Mateo 25:41 --Diosiri "yucanchi nin" tinun postoca quinue yucanca, junsí yachi seiton ocolacanan, casticaquichun. Yucan junbi mantamin itoe; junbi padeseimin joe.

E. Yucanchi ocolaca

- Mateo 25:41 --Diosi "yucanchi nin" tinun postoca quinue yucanca, junsí yachi seiton ocolacanan, casticaquichun.
- Pédrochi Benete 2:4 --Yucanchi seiton ocola casale ángelila jominlanue. Junni yucan seiton inasa, yalari yucanchi parte peilainue. Junni Diosi yalaca perdonaitunue.
- Júdachi 6 --Jutsa quica jun ángelilaca --aman "yucanchi ocola" tinunlaca-- Diosi casticaquichunae.
- Santiágochi 2:19 --Yucanchi ocolari quereiminla joe.
- Marcos 1:23 --Layainun yabi yucanchi oco pun tsachi wica jonan, Jesús ya ococa sularinue.

Marcos 3:15 --Jesús yachi tsachilaca poden suwanue yucanchi ocolaca sularino.

Marcos 5:2 --Duque yucanchi ocolari manca tsachichibi wica jominlaca Jesús sularinue.

Mantá Tanla 16:16 --Yucanchi oco sonachibi wica joto, yaca min suwanue niyan ino jonunca miisa carito.

1 Coríntolachi 10:20 --Diosica tennatuminlari adorailainato, yucanchi ocolaca adoraiminla joe.

--Yucanchi oco Jesucristobe cayaica junlachibi wituminla joe. Diosichi Pilabi nin man nesiri Diosichi tsachilachibi nechi yucanchi ococa sularinunca patue.

F. Jesucristo manpatano jonunca.

1 Tesalónicalachi 4:13-5:3 --Manpatano joe; puyaca junla mansonhilaichunae; Jesús yachi tsachilabe manpatachunae; casonaminla yalabe layailaichunae; numatotiya Miya Jesucristobe chuto polelaiyanae; monantiya miitolajoe numasi manpatano jonunca.

Mateo 24:14 --Sen fiqica jerale tote micarinunsi to jeraichunae.

Marcos 13:26 --Tsachila Jesucristo manpatanaminca quiralaquichunae.

G. Diosichi Pilabi chutecca jun fiqiri tsarasi quereintsan fiqisiri jonunca.

Israelítalachi 4:12

--Caque páginabi duque versículoca chutecca joe: Salmo 19:7-8, 2 Timotéochi 3:16, junsi uyanlanan.

H. Jesucristoca uyanlabe cuenta polarintsan jonunca.

Mantá Tanla 1:8 --Jesucristoca jeralelabe cuenta polarintsan joe.

2 Timotéochi 4:2 --Diosichi fiqica micarintsan joe.

Lucas 8:38-39 --Diosi chiquilachi tenchi quicaca uyanlabenan cuenta polarinola joyoe.

Románolachi 10:14-15 --Micarintsan joe yape tsachila cayaino podeilaisa.

IV. JESUCRISTOBE PENENAMINLA DIOSICHI TSACHILA JOTONAN, WEYAN
DOCTRINACA MAN QUIRAQUE MAN QUIRAQUE QUEREIMINLA JOE.

- A. Santa cenaca quinato, weyanlari "ma cura quintsan joe," weyanlari "tominco cura," weyanlari "pe cura," weyanlari "peman pe cura," weyanlari "wata cura quintsan joe" timinla joe. Aman 1 Coríntolachi 11:26 quirade! Natiya patue nisi chirin quino jonunca. Junnan monantiya uyanlaca "palaque quereiminla joe" tino podeitulajoyoe.
- B. Weyanlari Juan 13:5-14 quirato, "Amana matenan nede tsalecaanola joyoe" timinla joe. Tsan josanan, case jerale evangélicolari yaca quirato, "Nede tsalecaanocari patuto, beco beco ayudaicaanocari pánae" timinla joe.
- C. Weyanlari 1 Coríntolachi 11:4-6 quirato, "Sonala aca poresa carino itoe" timinla joe. Junsi "Sonala cultobi misu dono joe" timinla joe. Tsan josanan, seque estudaitori tenhinsan jochunae yaca patueque. Matu to tsachilachi miteri, unilabe mantaitiyoe timinlari aca poresa carimin, sombrero potumin, jominlanue. Junni aca o sombrero ca pánao, unilalabe mantainola joequeri pánae.
- D. Amana matenan Diosichi Ienca yachi tsachilaca titiya quino poden suwamin joe. 1 Coríntolachi 12:4-11, 28-31 quirato, tenhinsan joe amana matenan Diosi tsanquimin joeque. Tsan josanan, weyan evangélicolari yaca quereituto, "Te, jun matesiri Diosi tsanquimin jominue; amana tsanquitumin joe" timinla joe.

E. Weyanlari micarinato, itsántiminla joe: "Diosichi Tencabe seque mantaiminlari merátunun fiquichi palaquichunae timinla joe. Merátunun fiquichi patutori, Diosichi Tencabe seque mantaimin ("lleno del Espíritu") itochunae" timinla joe. Junnasanan, 1 Coríntolachi 12:28-31 seque quiratori, tenhintsan jochunae tsan itoeque. Diosi weyanlacasiri merátunun fiquichi pasa carichunae.

F. Culto quinato, ¿Niyán quitsan jun? Weyanlari nanni fe firara tin, sonba pato canta quin, quino muna punla jochunae. Weyanla mantimini nanni fe nosasa chudito, fe jamimínque pato culto quino muna pun jolajochunae. Diosichi Pilabi palu cosacanan pamin joe:

--Son tilatina! Lucas 1:42, Filípolachi 4:4 quiratori miichunae laqui cuwenta, polencari nosasa chuto, culto quituntsan joeque. Son tintsan joe.

--Seque, jamimínque nenalarana! 1 Coríntolachi 14:16,40, Mateo 12:19 quiratori miichunae duque firara tito culto quituntsan jochunaeque.

G. ¿Diosi numasi yachi tsachilaca jamochi tanlochunan?

Mateo 24:15-22 --To jeraino quello inasa, duque padeseinun tiempo jochunae.

Quirajanunca 7:14 --Ya padeseinun tiempote Diosi yachi tsachilaca tanlochunae.

--Weyanlari pato, "Padeseinun tiempo ichinasa Diosi chiquilaca larichunae" timinla joe. Weyanlari pato, "Padeseinun tiempo quitsate chiquilaca larichunae" timinla joe. Weyanlari pato, "Padeseinun tiempo jerainunsi chiquilaca larichunae" timinla joe.

Jeralela man junni paminla joe Jesucristo manpatato chiquilaca larichunaeque. Juntonan monantiya tsa seguro patsa jono podeitue numasi chiquilaca larino jonunca.

H. Weyanlari pato, "Diosichi na ica joto, numanan yachi na iton manhino podeituntsan joe" timinla joe. Weyanlari pato, "podeintsan joe" timinla joe.

Juan 10:28-29 --Jesucristo numatotiya sonato polesa carica junlaca monantiya manjosoleno podeituchunae yape manaman perdeilaisa. In fiqिकासिरी quiratori, "Diosichi iton manhino podeituntsan joe" tichunae.

Mateo 10:22 --Peleituminlari se lolaichunae. In fiqिकासिरी quiratori, "Diosichi iton manhino podeintsan joe" tichunae.

I. Diosichi parte; chiquilachi parte.

1. Diosisiri jera mantamin, controlaquimin, ticatiya josa carimin, joe. (Tsan jonari, salvacionca manperdeino podeituntsan joeque tenca cantsan jochunae.)

Salmo 139:16 --La canaitusanan Diosi jera paca jominue la ma cura ti quino jonunca.

Efésolachi 1:4,5,11 --Diosi chiquilaca wentenue.

Románolachi 8:29-30 --Numarile nechi chiquilaca wentenue.

Deuteronomio 7:6-7 --Diosi yachi tenca munate wentemin joe.

Juan 15:16 --Jesucristo pato, "Nula laca wentetulajoe; lari nulaca wenteyoe" tinue.

Románolachi 9:11-16 --Diosi yachi tenca munateri quimin joe.

Juan 6:44 --Diosi weyanlacari cayaino munarasa carichunae. Junni yalasiri cayailaichunae.

Efésolachi 2:8-9 --Diosi chiquilaca laquichiri se larinue yape monantiya "Fe sen joyoe" tino podeilaitusa. Tsan jonari, ¿laca numanan epele mannenasa carituchunaco?

2. Isachilari tenfeto, wenteto, peleituto wantainola joe se lochun. (Tsan jonari, salvaciónca manperdeino podeintsan joeque tenca cantsan jochunae.)

Mantá Tanla 2:40 --In seitonlachile nechí se lolaide!

(Nula, nulachi tenca munate, se lolaide!)

1 Timotéochi 4:1 --Weyanla Diosichi tsachila jotonan, yachi sen fiqica telaquepolaquichunae.

Juan 6:37 -- Motiya Jesucristobe cayailainari, yalaca numanan telaquepotuchunae.

Juan 5:29 --Seque quiminla se lolaichunae.

Israelítalachi 6:4-6 --Weyanla Diosichi tsachila ica jotonan, yaca mantelaquepolaquichunae.

Israelítalachi 10:37-39 --Peleiminlari yucanhibi padeseilaichunae. Tsan jonari, ¿la seque nenatunari, laca mantelaquichunaco?

3. Palu fiqinan tsa joe. Diosi chiquilaca wenteto se larica joe yachi tenca munate. Chiquilari chiquilachi tenca munate yucanca purato Jesucristobe cayaiminlayoe.

Pédrochi Benete 1:10 --Diosi nulaca wenteca josa, nulanen tenfenola joe.

Filípolachi 2:12-13 --Diosi chiquilaca sen jono munarasa carito, junsí sen jono podeisa carimin joe.

- V. ¿UYAN QUIRAQUE QUEREIMINLACA NIYAQUE TENCA CANTSAN JUN?
2 Coríntolachi 6:14-16 --Diosichi tsachilari Diosichi itonlabe man junni itonola joyoe.

- A. Fécari tennantsan jun doctrinaca palaque pánari, fécari wa problema jochunae.

Galásilachi 1:6-9 --Apóstol Pablo palaque micariminlaca pato, "Diosi yalaca yucaquintsan joe" tinue.

Juanchi Caque 4:1-3 --Palaque micariminlari Jesucristoca pa jolajoe.

Mantá Tanla 20:29-30 --Weyan micariminlari quela cuwenta encanabe jato, Jesucristochi tsachilaca yucapiyarilaquichunae.

B. No palaque (seiton fiqica) quereinunca.

1. Iglesia Jesús Miya membrori seiton fiqica quereinari, yaca mantucarintsan joe.
2. Iglesia Jesús Miyabi micarimin tsachi seiton fiqica quereinari, yaca micarisa carituntsan joe.
3. Uyan tsachi o fetó seiton fiqica quereinari, yacanan mantucarino tenfentsan joe. Junsi yaca numanan Jesús Miya Iglesiabi micarisa carituntsan joe.
4. Uyan iglesia seiton fiqica quereinari, ya iglesiaca visitaibi jituntsan joe. Junsi yalaca o micaribi, o número especial quebi, jasa tituntsan joe.

C. Weyan Jesucristobe penenaminlari ya seiton fiqica quereituminla jotonan, chiquila cuwentanan quereiminla itochunae. Yalaberi acola tala nenanola joyoe laquiracaato.

Marcos 9:38 --Weyanla Jesuchi apostólilabe pelayaitutonan, "Jesucristochi tsachila jolajoyoe" tinaminlanue. Junnan apóstolila yalaca pailainue "Chiquilabe peitolajoe" tito. Jesús mantimini junca seitoe tinue. Junnan mirantsan joe weyanlari chiquilabe pelayaituminla jotonan sen jolajochunaeque.

Románolachi 14:1-6 --Weyan doctrina tenchi wepanano itochunae. Jun doctrinaca weyanlari man quiraque, weyanlari man quiraque quereilaichunae. Junni Pablo yaca "Yape!" tinae.

Galásialachi 2:1-2 --Weyan' apóstolila Pablo cuwenta micarituminla jotonan, Pablolaca "Seque micariminla joe" tilatinue.

Galásialachi 2:6-8 --Pédrolari Pablo micarica fiquica cambiacarichique tenfelaquitunue.

D. Pataato nenaminla. Weyante tuca micariminlanan Diosica obedeseitoto duque paiminla jochunae. ¿Aman yalacari niyaque tenca cantsan jochunan?

Mateo 23:1-3 --Seiton fariséolari Diosichi Pilaca micarinaminlanue. Junnan Jesucristo itsanque mantanue: "Yalaca obedeseitonan, yala cuwenta nenalaratuna!" tinue.

Filípolachi 1:15-18 --Weyan micariminla Pablocu duque pa jolajosanan, Pablo son tinaminue Diosichi fiquica micarilaquinaequeri.

Juanchi Debi 9-10 --Manca tsachi Jesucristobe penenamin jotonan, Juanca paito duque pasuwanaminue. Junnan Juan yachi contra beconan paniquinue.

VI. ¿JESUCRISTOCHI TSACHILARI NIYAQUE NENAMINLA JUN?

A. Jutsa itonunca, jungsi culpa itonunca. Jesucristobe cayaicale nechi tsanle culpa iton jolajoyoe. Puyano fecári nanni fe jutsa iton ide ide jilainayoe.

Románolachi 5:1 --Cayaica jominlaca Diosi "Sen jolajoe; culpa itolajoe" timin joe.

Juanchi Caque 1:8-9 --Jeralala Jesucristobe cayaicala jotonan, jutsanan catalarayoe. Motiya "Amananan ni manca jutsatiya itoyoe" titori, nene pánae. Juntonan, Jesucristo chiquilachi jutsaca piyariniquimin joe yabe jera paniquinari.

- B. Tسانle se larica jun joto, junte nechi fe se ide se ide jilainayoe.

Románolachi 12:1-2 --Cayaicale nechi casan tenca ide ide jilainayoe.

Filípolachi 3:12 --Pablo "Sen patse caitiyoe" titonan, "seichique petenfenayoe" tinue.

- C. Junni Jesucristobe cayaica junlari jutsa quinola itotonan, pansile jutsa quilaquichunae. Tسانquilaquinari, ¿niyaque tenca cantsan jun?

1. Seque nenachique tenfenatonan, jutsa quiniquitori, yanan laqui ichunae jutsa quiyoeque. Junnan yaca laquirato, payito, ayudaintsan jochunae ya jutsaca tsanle purasa. Galácialachi 6:1 quirade!

2. Diosichile nechi nuwiri nenato, seque nenachique nin tenfentiya quitutori, pansile numanan Jesucristobe tsa cayaituca jochunae. O pansile tsa cayaica jotonan, Diosica mantelaquepoca jochunae. Juanchi Caque 3:6-ca quirade!

"IGLESIA" TINUNCA

I. "IGLESIA" TI JONUNCA.

A. Matu griego fiqichichi "ekklesia" tinun fiquiri "wenteto oticaya junla" tinun joe. Diosi chiquilaca wenteto oticaya joe yachi tsachila jolajosa.

B. Diosichi Pilabi iglesiaca ti joe tinunca.

Mantá Tanla 2:47, 5:11, 8:1, 11:22 --Jesucristochi tsachila layaica junlaca "iglesia" tinun joe.

C. Diosichi Pilabi comparación quito, ¿iglesiaca niyan tin?

1. Diosichi ya cuwenta jolajoyoe.

2 Coríntolachi 6:16 --Diosi chiquilabe penenanán, yachi ya jolajoyoe.

Efésolachi 2:20-21 --Diosichi Tenca chiquila layaica junlachibi chue.

2. Cristochi puca cuwenta jolajoyoe.

Colósalachi 1:18,24-25 --Yachi puca jolajonan, yari chiquilachi misu joe.

Efésolachi 5:23-32

3. Iglesia Jescristobe casalaino jun sona cuwenta joe.

2 Coríntolachi 11:2

Quirajanunca 21:2,9

4. Iglesia Diosichi familia cuwenta joe.

1 Timotéochi 3:5 --Ancianola tencachique familiaralaca seque mantano podeitutori, Diosichi familia junlakanan seque mantano podeilaituchunae.

1 Timotéochi 3:15

Galásialachi 4:6 --Diosica "Apa" (o "papito") timinla joyoe.

Israelítalachi 2:11-12 --Jesucristo chiquilaca "acola, soquila" timin joe.

5. Mateo 16:18-bi Jesucristo "wa suca" pato, Pédroca tsantitunue; Pedro paca figuicari "wa su cuwenta joe" tinue.

II. IGLESIABI MANTAMINLA.

A. Iglesiabi mantá tanla "ancianola" jolajoe.

Mantá Tanla 15:2,4,6 --Iglesia mantá tanlaca pato, "apóstolila, ancianola" tinue. Amana mate jerale apóstolila numa puyacala jonan, iglesia mantaminla ancianolasiri jolajoe.

Mantá Tanla 20:17

Filípolachi 1:1

1 Coríntolachi 12:28 --Iglesiasiabi trabajaquiminla weyanlari Diosichi mantate paminla, weyanla micariminla, weyanlari uyan quiraque quiminla, jolajoe.

B. Ancianola sen unilala jonola joe.

1 Timotéochi 3:1-7

Títochi 1:7-9

1 Timotéochi 2:12 --Sonala iglesiabi mantano itolajoe.

C. Ancianola itsanquinola joe.

1. Mantano.

1 Timotéochi 3:2

Pédrochi Caque 5:1-4

2. Micarino.

1 Timotéochi 6:2

2 Timotéochi 2:2 --Tsachilaca micarinola joe yape yalanan uyanlaccanan manmicarilaquisa.

2 Timotéochi 2:24

3. Payino.

2 Timotéochi 4:2
Títochi 1:9,13; 2:15
1 Tesalónicalachi 5:14

4. Mantucarino.

Mateo 18:17 --Diosichi tsachila tala problema jonari,
yala talanan se patarinola joe. Abogadolabe se
pataritutnsan joe.

1 Coríntolachi 5:1-4 --Jutsa quino deituchi
timinlacanan pansile iglesiabi nechi sularinola
jochunae.

(Jun mate manca pueblobi mancasiri iglesia
jominue. Amana mate manca iglesiabi nechi
larilaquinari, "yape" tito mancacari jiniino
podeichunae.)

2 Coríntolachi 2:5-8 --Iglesiaabi nechi laritori,
inale manpocanola jochunae jutsaca puralaquinari.

5. Santa Cena quimiyano.

1 Coríntolachi 11:27-32

6. Mumunno.

Mantá Tanla 2:41, 8:35-38

Mateo 28:19 --Cayaica junlacari mumunnola joe.

Juan 4:1-2 --Jesucristo patsa mumuntunue; yabe
peayudaiminlari mumunmin jominlanue.

1 Coríntolachi 1:14-16 --San Pablo patsa layan
mumuntumin jominue; yabe petrabajaquiminlari
fécarí mumunmin jominlanue.

7. Quiyanpunlachi tenchi rocaino.

Santiágochi 5:14

D. Ancianolaca itsanque wentemin jominlanue.

Mantá Tanla 14:23 --In versículobi apóstolilari
ancianola suwalaquinue.

Títochi 1:5 --Títori Páblochi mantate ancianola
suwanue.

1 Timotéochi 3:1 --Anciano jono munarano se joe.

Mantá Tanla 6:1-6 --Deáconola suwanato, caquitunun
cosacari Diosi mantaca jun quilaquinue jeleratuto.
"Amana fecari nátiya tsanque quetumin jominlayoe;
junto numanan tsanquino itolajoyoe" tituntsan joe.

E. Weyan Jesucristobe penenaminlari ancianolaca respetaito
meránola joe.

1 Tesalónicalachi 5:12-13

1 Timotéochi 5:17

F. Anciano jutsa quito nenanari, ti quintsan jonunca.

1 Timotéochi 5:19 --Paluca o pemañca testigo itonari,
ancianolaca culpa quica fiqicari quereituntsan joe.
Juanchi Debi 9, 10 --Weyante ancianolanan jutsa
quilaquichunae.

1 Timotéochi 5:20 --Ancianolari jutsa quilaquinari,
yalaca jeralalachi cale payintsan joe.

Santiágochi 3:1-2 --Micariminlaca Diosi nanni fe tuca
miichunae seque quinanunca o seitonque quinanunca.

III. IGLESIABI TI QUINOLA JONUNCA

A. Diosichi tenchi (Diosica tenca cato) ti quinola jonunca.

1. Santa Cena.

Lucas 22:19
1 Coríntolachi 11:24

2. Canta quino.

Efésolachi 5:19
Colósalachi 3:16

3. Diosica se tino.

Mantá Tanla 2:42
1 Coríntolachi 14:25
Israelítalachi 13:15

B. Jesucristochi tsachila tala ti quinola jonunca.

1. Sonba tenca suwacaano.

1 Coríntolachi 12:4-30 --Beco beco ayudaicaanola joe.
1 Coríntolachi 14:4,5,12 --Titiya quinato, soba tenca
suwacaachun tsanquintsan joe.
Israelítalachi 10:25 --Layaino deituntsan joe.
Juan 13:35 --Laquiracaalaquina!

2. Beco beco ayudaicaano.

Galásialachi 6:2,10

3. Problemaca se patarino.

1 Coríntolachi 6:1-8
Mateo 18:17

C. Jesucristobe cayaica itonlaberi niyaque nenantsan jonunca.

1. Jesucristochi tenchi pano.

Mantá Tanla 1:8 --Jeralelabe cuenta polarintsan joe.

Pédrochi Caque 3:15 --Michi miica jonola joe tíca
quereinunca pachun.

1 Timotéochi 3:15 --Jesucristochi tsachilabesiri
tsarasi fiquica miino podeintsan joe.

2. Ayudaino.

Galásialachi 6:10

3. "Pinba cuwenta" jono.

Mateo 5:13 --Diosichi tsachilari Diosica
tennatuminlacanan nanni fe seque nenasa carintsan
joe.

4. Gobierno mantá tanlaca respetaino.

Románolachi 13:1-7 --Gobiernoca, cabildolaca,
ticatiya obedesinola joyoe.

1 Timotéochi 2:1-3 --Yalachi tenchi rocaínola joyoe.

IV. IGLESIALA TALA NIYAQUE NENANTSAN JONUNCA.

A. Matu ma iglesiabi:

1. Manca iglesiari, manca iglesiaca mantá tan itominue;
jeralala chican chican jominlanue.

2. Manca iglesiachi ancianolari manca iglesiabi mantá tan
itominlanue.

3. Apóstolilasiri duque iglesiabi mantá tan jominlanue.

B. Amana mate:

1. "Denominaciones," o "sectas" -- ti jonunca; niyaito tsan ica jonunca.

a. Weyante doctrinaca uyan quiraque quereinun tenchi uyan bolon ica junla.

--Fécari tennantsan jun doctrinaca telaquepoto, chican ica jun bolonla. Duque palaicala joe; yalaca telaquinola joyoe.

-Adventístala --"Yucanchi nin itoe" timinla joe. Aman Antiguo Testamentobi Diosi weyan mantaca israelítalachi tenchisiri cuwaca jominue. Junni ya mantacanan "chiquilanan meránola joyoe" timinla joe.

-Testigos de Jehováh --"Jesucristo Diosi itoe; tencachique sonbachi se lonola joyoe" timinla joe.

-Mormonla --"Apa Diosinan matu mate tsachi jominue" timinla joe. "Duque na tano joe" timinla joe "Diosichi sen tsachi jochun. Junsi tencachique sonbachi se lonola joyoe" timinla joe.

-Jesús Sólola --"Trinidadca 'doctrina del diablo' joe" timinla joe. "Apa Diosichi mumunbe, Naochi mumunbe, Diosichi Tencachi mumunbe mumunhica jotori, se lotuchunae" timinla joe. Junsi uyan iglesialaca duque pasuwaminla joe. Jesucristobe numa cayaica junlaca sen iglesiabi nechi larito, Jesús Solo suwachique tenfeminla joe.

-Iglesia Católica --Matu mate Iglesia Católica Románabi jutsa quino permiso osimin jominlanue; ya iglesiaca purachi timinlaca duque sonbaque casticaquimin jominlanue; uyan duque seiton cosa quimin jominlanue. Amana mate católicolanan yaca "seitominue" timinla joe. Junsi amana ma cuuenta purgatorio joeque, Jesucristobesiri se lono itoeque, santolaca adoraintsan joeque, Jesuchi ayannan se larimin joeque, micarimin jominlanue. Junni weyanlari ya dotrinaca "Diosichi Pilabe natiya parejo itoe" tito, Iglesia Católicabi nechí chican loto, casan iglesia quilaquinue.

--Uyan doctrina tenchi chican ica jun bolonla.
(Uyan doctrina jotonan, seiton doctrina itoe.)

-Iglesia El Paraíso: Yalachi miteri, duque tencabe nenatunari, salvaciónca perdeintsan jochunae.

-Iglesia Bautista: Santa Cena tominco cura quituminla joe; pastor talarae; duque iglesiala layaito, wa sociedad ("Denominación Bautista" tinun) icala joe.

-Iglesia El Salvador --Bautístala cuuenta, juntonan denominaciónbi miembro itolajoe.

-Iglesia Asambleas de Dios --Diosichi Tencaca duque paminla joe. Denominaciónbi pejolajoe.

- b. Weyante uyan costumbre tenchi, o uyan fiqui pamin jonun tenchi chican ica jun bolonla.

--Iglesia Luterana, o Iglesia Episcopal: Yalachi iglesiaca, junsu pastorilaca, duque moso suwachique tenfeminla joe "tsanque Diosica fe seque adoraino podeintsan joe" tito. Pastorilari baren camisa pominla joe case patele cuwenta. Tsan jotonan, weyan iglesia Luterana, weyan iglesia Episcopal, Diosichi Pilaca tsa micariminla joe. Junni yalachi costumbre tenchiri chican jolajoe.

--Iglesia Buen Pastoribi castila fiquichi paminla joe; Iglesia Jesús Miyabi tsafiquichi paminla joe. Junni uyan fiqui paminla jonun tenchi chican jolajoe.

2. ¿Man postobi niyanca iglesia?

- a. Matu mate pueblo cura manca iglesiasiri jominue.

- b. Amana materi mancasiri itoe.

--Junto wenteno joe. Junni wenteno jotonan, sen iglesiabi miembro jotori, cambiaituntsan joe.

--Numasi sen iglesiabi visititaino se jonunca. "Lachi iglesiabinan in horate culto jotonan, junchi jituto, mancaca visitaibi jichinayoe" tituntsan joe. "In horate lachi iglesiabinan culto joe, junto mancaca visitaibi jitiyoe" tintsan joe. "Manca mate visitaibi jiyanae" tintsan joe.

--Palaque quereimin iglesiaca visitaibi jituntsan joe.

--Uyan iglesiaca visitaibi jino munaratori, duque tenca cato, mirato, jintsan joe.

--Jerale Iglesia Jesús Miya miembrola layaito manca iglesiaca visitaibi jino munaralaratori, duque tenca cato, mirato, jintsan joe. Junto jeralesaca meracarintsan joe. Iglesiabi mantá tanlasiri trato quintsan joe visitaibi jichun.

--Manca iglesiabi micarisa, o canta quisa, o titiya quisa invitaquilaquinari, duque tenca cato, mirato, jintsan joe. Palaque quereimin iglesiaca natiya jituntsan joe.

V. DIOSICHI MANTABE COSTUMBREBE. Jerale tobi Jesucristochi tsachila Diosichi mantaca meráto nenato, yalachi costumbretenan nenaminla joe.

A. Jerale tobi weyan costumbre sen jochunae. Jesucristochi tsachila ya costumbre nenanola jochunae. Tenfenola jochunae ya costumbre piyatusa. Juntonan ya costumbre nenatuminlari miembro ino munaralaranari, prohibiquituntsan joe.

--Mantá Tanla 6:1 -- Israelítalachi costumbre nenato, Jesucristochi tsachilanan viudalaca cuidaimin jominlanue.

--Weyan tobi na quino mate, o puyano mate, ano dacaca familiarachica tanjiminla joe.

--Poperelachi ticatiya epe cuwano sen costumbre joe.

--Weyan tobi, tsachila ticatiya duque tenca catori, ya tenca caya junca canta quiminla joe.

B. Jerale tobi weyan costumbre ni sen, ni seiton itoe. Ya costumbretenan Jesucristochi tsachila nenano se joe. Manca tobi manca tobi Diosichi tsachi bolonla man quiraque man quiraque nenan, adorain, Diosica se tin, tilatichunae. Ya se joe. Fetolalachi mite nenan, micarin, adorain, itunari, fetolalari meralaquituchunae. Junsi tsachilachi mite nenan, micarin, adorain, itunari, tsachilari yaca munaratuto meralaquituchunae.

--Marcos 4:1 -- Micariminla tile wirurano (o chudino) jolajonunca. Israelitalachi mite micarimin tsachila chudito micarimin jominlanue.

--¿Ti música fetolalachi tenchi fe se jochunan? ¿Tsachilachi tenchi? ¿Aucalachi tenchi? Jera sen música joe.

--Santa Cena quinato, Iglesia Buen Pastoribi man quiraque quiminla joe; Iglesia Jesús Miyabi man quiraque quiminla joe. Palunan se joe.

--¿Layaica junlari tile chudinola jun? Fetolalachi mite unilalabe sonalabe jera palaito chuminla joe. Tsachilachi mite unilala man nanchi, sonala man nanchi chuminla joe. Palu costumbrenan sen joe.

C. Juntonan jerale tobi weyan costumbre seiton jochunae. Ya costumbreca Jesucristochi tsachilari meráno itolajochunae.

--Lucas 14:12-14 --Fiestaca invitaquinato, yalaca beco invitaquino junlacasiri invitaquimin jominlanue.

--Weyan tobi na quino mate nachi apa amigolachi cigarro cuwamin joe. Ya costumbreca telaquepotsan joe.

--Weyan tobi Navidad mate aguardiente cuwaminla joe. Ya costumbrecanan telaquepotsan joe.

--Esquimalilachi mite, amigo catsode janari, ya tsacumi yachi sonaca amigochi faricarino jominue yabe catsosa. Esquimalilari Diosichi Pilaca meráto, ya costumbreca numa telaquepocala joe.

--Weyan tobi unilala paluca sona taminlae. Junni jun tobi Jesucristobe cayaica junlari ya costumbreca telaqueponola joe.

D. ¿Jesucristobe penenamin tsachila niyan tinola jun?

1. ¿Nulari ti sen costumbreca seque tennanola joyun? Ya costumbrete nenalarana! Juntonan ya costumbreca tennatuminlari miembro ino munaralaranari, prohibiquituntsan jochunae.
--Ma cura pipiyano.
--Sen lu jono.
--Quiyala suedrolaca ayudaino.

2. ¿Ti uyan costumbrete nenano se jochunan?

- Múmunno.
- Tunan awinno.
- Toca (wita quinunca, jelenchi jinunca) duque tennano.
- Duque chirin layaituno.
- Layaito fiesta quino.
- Santa Cenate vinoca polarituto, jeralala cale layaino cuchichun.
- In costumbrete nenano natiya jutsa itoe. Juntonan in costumbreca telaquepomanpari, jutsa itono jonhoe. Juntonan lachi tencari sen costumbre joe. Yaca tenca cato nenanari duque se jochunae.

3. ¿Ti seiton costumbreca telaquinola joyun? (¿"Yape" tintsan jun? ¿0 cambiacarichique tenfentsan jun?) Ya costumbreca telatuchi timinlari miembro ino munaralaranari, ¿niyan tintsan jun?

- Duque lu punla jono.
- Problemaca tede potuchi tino. Problema jonari, joqueito, "yape" tito chican lono.
- Páca numari fecári mantennano.

--Titiya duque cajoe:

- Costumbre sen jonari, catana!
- Seiton jonari, Diosibe rocaína! yape yari ayudaisa fe lono podeichun.

